

摘藻堂四庫全書薈要

史部

欽定四庫全書薈要

史部

明史卷九十四至
六

詳校官編修巨繆晉



欽定四庫全書薈要卷六千六百八十七 史部

明史卷九十四

大學士張廷玉等奉 勅修

志第七十

刑法二

三法司曰刑部都察院大理寺刑部受天下刑名都察院糾察大理寺駁正太祖嘗曰凡有大獄當面訊防構陷鍛鍊之弊故其時重案多親鞠不委法司洪武十四



年命刑部聽兩造之詞議定入奏既奏錄所下旨送四
輔官諫院官給事中覆覈無異然後覆奏行之有疑獄
則四輔官封駁之踰年四輔官罷乃命議獄者一歸於
三法司十六年命刑部尚書開濟等議定五六日旬時
三審五覆之法十七年建三法司於太平門外鍾山之
陰命之曰貫城下勅言貫索七星如貫珠環而成象名
天牢中虛則刑平官無邪私故獄無囚人貫內空中有
星或數枚者即刑繁刑官非其人有星而明為貴人無

罪而獄今法天道置法司爾諸司其各慎乃事法天道

行之令貫索中虛庶不負朕肇建之意又諭法司官布

政按察司所擬刑名其間人命重獄具奏轉達刑部都

察院參考大理寺詳擬著為令刑部有十三清吏司治

各布政司刑名而陵衛王府公侯伯府在京諸曹及兩

京州郡亦分隸之按察名提刑蓋在外之法司也叅以

副使僉事分治各府縣事京師自答以上罪悉由部議

洪武初決獄答五十者縣決之杖八十者州決之一百

者府決之徒以上具獄送行省移駁繁而賄賂行乃命
中書省御史臺詳讞改月報為季報以季報之數類為
歲報凡府州縣輕重獄囚依律決斷違枉者御史按察
司糾劾至二十六年定制布政司及直隸府州縣笞杖
就決徒流遷徙充軍雜犯死罪解部審錄行下具死囚
所坐罪名上部詳議如律者大理寺擬覆平允監收候
決其決不待時重囚報可即奏遣官往決之情詞不明
或失出入者大理寺駁回改正再問駁至三改擬不當

將當該官吏奏問謂之照駁若亭疑讞決而囚有番異則改調隔別衙門問擬二次番異不服則具奏會九卿鞫之謂之圓審至三四訊不服而後請旨決焉正統四年稍更直省決遣之制徒流就彼決遣死罪以聞成化五年南大理評事張鈺言南京法司多用嚴刑迫囚誣服其被糾者亦止改正而無罪甚非律意乃詔申大理寺叅問刑部之制弘治十七年刑部主事朱塗言部囚送大理第當駁正不當用刑大理卿楊守隨言刑具永

樂閒設不可廢帝是其言會官審錄之例定於洪武三
十年初制有大獄必面訊十四年命法司論囚擬律以
奏從翰林院給事中及春坊正字司直郎會議平允然
後覆奏論決至是置政平訟理二藩審諭罪囚諭刑部
曰自今論囚惟武臣死罪朕親審之餘俱以所犯奏然
後引至承天門外命行人持訟理藩傳旨諭之其無罪
應釋者持政平藩宣德意遣之繼令五軍都督府六府
都察院六科通政司詹事府間及駙馬雜聽之錄寃者

以狀聞無寃者實犯死罪以下悉論如律諸雜犯准贖
永樂七年令大理寺官引法司囚犯赴承天門外行人
持節傳旨會同府部通政司六科等官審錄如洪武制
十七年令在外死罪重囚悉赴京師審錄仁宗特命內
閣學士會審重囚可疑者再問宣德二年奏重囚帝令
多官覆閱之曰古者斷獄必訊於三公九卿所以合至
公重民命卿等往同覆審毋致枉死英國公張輔等還
奏訴枉者五六十人重命法司勘實因切戒焉天順三

年令每歲霜降後三法司同公侯伯會審重囚謂之朝
審歷朝遂遵行之成化十七年命司禮太監一員會同
三法司堂上官於大理寺審錄謂之大審南京則命內
守備行之自此定例每五年輒大審初成祖定熱審之
例英宗特行朝審至是復有大審所矜疑放遣嘗倍於
熱審時內閣之與審也自憲宗罷至隆慶元年高拱復
行之故事朝審吏部尚書秉筆時拱適兼吏部故也至
萬曆二十六年朝審吏部尚書缺以戶部尚書楊俊民

主之三十六年復缺以戶部尚書趙世卿主之崇禎十
五年命首輔周延儒同三法司清理淹獄蓋出於特旨
云大審自萬曆二十九年曠不舉四十四年乃行之熟
審始永樂二年止決遣輕罪命出獄聽候而已尋并寬
及徒流以下宣德二年五六月連諭三法司錄上繫
囚罪狀凡決遣二千八百餘人七年二月親閱法司所
進繫囚罪狀決遣千餘人減等輸納春審自此始六月
又以炎暑命自實犯死罪外悉早發遣且馳諭中外刑

獄悉如之成化時熟審始有重罪矜疑輕罪減等枷號
踈放諸例正德元年掌大理寺工部尚書楊守隨言每
歲熟審事例行於北京而不行於南京五年一審錄事
例行於在京而畧於在外今宜通行南京凡審囚三法
司皆會審其在外審錄亦依此例詔可嘉靖十年令每
年熟審并五年審錄之期雜犯死罪准徒五年者皆減
一年二十三年刑科羅崇奎言五六月間答罪應釋放
徒罪應減等者亦宜如成化時欽恤枷號例暫與蠲免

至六月終止南法司亦如之報可隆慶五年令贓銀止
十兩以上監久產絕或身故者熱審免追釋其家屬萬
厯三十九年方大暑省刑而熱審矜疑疏未下刑部侍
郎沈應文以獄囚久滯乞暫豁矜疑者未報明日法司
盡按囚籍軍徒杖罪未結者五十三人發大興宛平二
縣監候乃以疏聞神宗亦不罪也舊例每年熱審自小
滿後十餘日司禮監傳旨下刑部即會同都察院錦衣
衛題請通行南京法司一體審擬具奏京師自命下之

日至六月終止南京自部移至日為始亦滿兩月而止
四十四年不舉行明年又逾兩月命未下會暑雨獄中
多疫言官以熱審愆期朝審不行詔獄理刑無人三事
交章上請又請釋楚宗英嫵蘊鈐等五十餘人墨誤知
縣滿朝薦同知王邦才卞孔時等皆不報崇禎十五年
四月亢旱下詔清獄中允黃道周言中外齋宿為百姓
請命而五日之內繫兩尚書不聞有抗疏爭者尚足回
天意乎兩尚書謂李日宣陳新甲也帝方重怒二人不

能從厯朝無寒審之制崇禎十年以伐州知州郭正中
疏及寒審命所司求故事尚書鄭三俊乃引數事以奏
言謹按洪武二十三年十二月癸未太祖諭刑部尚書
楊靖自今惟犯十惡并殺人者論死餘死罪皆令輸粟
北邊以自贖永樂四年十一月法司進月繫囚數凡數
百人大辟僅十之一成祖諭呂震曰此等既非死罪而
久繫不決天氣沍寒必有聽其冤死者凡雜犯死罪下
約二百悉准贖發遣九年十一月刑科曹潤等言昔以

天寒審釋輕囚今囚或淹一年以上且一月間瘐死者
九百三十餘人獄吏之毒所不忍言成祖召法司切責
遂詔徒流以下三日內決放重罪當繫者恤之無令死
於饑寒十二年十一月復令以疑獄名上親閱之宣德
四年十月以皇太子千秋節減雜犯死罪以下宥笞杖
及枷鎖者嗣後世宗神宗或以災異修刑或以覃恩布
德寒審雖無近例而先朝寬大皆所宜取法者奏上帝
納其言然永樂十一年十月遣副都御史李慶齋璽書

命皇太子錄南京囚贖雜犯死罪以下宣德四年冬以天氣沍寒勅南北刑官悉錄繫囚以聞不分輕重因謂夏原吉等曰堯舜之世民不犯法成康之時刑措不用皆君臣同德所致朕德薄卿等其勉力匡扶庶無愧古人此寒審最著者三俊亦不暇詳也在外恤刑會審之例定於成化時初太祖患刑獄壅蔽分遣御史林愿石恒等治各道囚而勅諭之宣宗夜讀周官立政式敬爾由獄以長我王國慨然興嘆以為立國基命在於此乃

勅三法司朕體上帝好生之心惟刑是恤令爾等詳覆天下重獄而犯者遠在千萬里外需次當決豈能無冤因遣官審錄之正統六年四月以災異頻見勅遣三法司官詳審天下疑獄於是御史張驥刑部郎林厚大理寺正李從智等十三人同奉勅往而復以刑部侍郎何文淵大理卿王文巡撫侍郎周忱刑科給事中郭瑾審兩京刑獄亦賜之勅後評事馬豫言臣奉勅審刑竊見各處捉獲強盜多因讎人指攀拷掠成獄不待詳報死

傷者甚多今後宜勿聽妄指果有贓證御史按察司會審方許論決若未審錄有傷死者毋得准例陞賞是年出死囚以下無數九年山東副使王裕言囚獄當會審而御史及三司官或踰年一會囚多瘐死往者常遣御史會按察司詳審釋遣甚衆今莫若罷會審之例而行詳審之法勅遣按察司官一員專審諸獄部持舊制不可廢帝命審例仍舊復如詳審例選按察司官一員與巡按御史同審失出者姑勿問涉贓私者究如律成化

元年南京戶部侍郎陳翼因災異復請如正統例部議以諸方多事不行八年乃分遣刑部郎中劉秩等十四人會巡按御史及三司官審錄勅書鄭重遣之十二年大學士商輅言自八年遣官後五年於茲乞更如例行帝從其請至十七年定在京五年大審即於是年遣部寺官分行天下會同巡按御史行事於是恤刑者至則多所放遣嘉靖四十三年定坐贓不及百兩產絕者免監追萬歷四年勅雜犯死罪准徒五年者并兩犯徒律

應總徒四年者各減一年其他徒流等罪俱減等皆由恤刑者奏定所生全者益多矣初正統十一年遣刑部郎中郭恂員外陸瑜審南北直隸獄囚文職五品以下有罪許執問嘉靖間制審錄官一省事竣總計前後所奏依准改駁多寡通行考覈改駁數多者聽劾故恤刑之權重而責亦匪輕此中外法司審錄之大較也凡刑部問發罪囚所司通將所問囚數不問罪名輕重分南北人各若干送山東司呈堂奏聞謂之歲報每月以見

監罪囚奏聞謂之月報其做工運炭等項每五日開送
工科填寫精微冊月終分六科輪報之凡法官治囚皆
有成法提人勘事必齋精微批文京外官五品以上有
犯必奏聞請旨不得擅勾問罪在八議者實封以聞民
間獄訟非通政司轉達於部刑部不得聽理誣告者反
坐越訴者笞擊登聞鼓不實者杖許告問官必覈實乃
逮問至罪囚打斷起發有定期刑具有定器停刑有定
月日檢驗屍傷有定法恤囚有定規籍沒亦有定物惟

復讎者無明文弘治元年刑部尚書何喬新言舊制提
人所在官司必驗精微批文與符號相合然後發遣此
祖宗杜漸防微深意也近者中外提人止憑駕帖既不
用符真偽莫辨姦人矯命何以拒之請給批文如故帝
曰此祖宗舊例不可廢命復行之然旗校提人率齋駕
帖嘉靖元年錦衣衛千戶白壽等齋駕帖詣科給事中
劉濟謂當以御批原本送科使知其事兩人相爭並列
上命檢成弘事例以聞濟復言自天順時例即如此帝

入壽言責濟以狀對亦無以罪也天啟時魏忠賢用駕帖提周順昌諸人竟激蘇州之變兩畿決囚亦必驗精微批嘉靖二十一年恤刑主事戴梗吳元璧呂顥等行急失與內號相驗比至與原給外號不合為巡按御史所糾納贖還職成化時六品以下官有罪巡按御史輒令府官提問陝西巡撫項忠言祖制京外五品以上官有犯奏聞不得擅勾問今巡按輒提問六品官甚乖律意當聞於朝命御史按察司提問為是乃下部議從之

凡罪在八議者實封奏聞請旨惟十惡不用此例所屬
官為上司非理凌虐亦聽實封徑奏軍官犯罪都督府
請旨諸司事涉軍官及呈告軍官不法者俱密以實封
奏無得擅勾問嘉靖中順天巡按御史鄭存仁檄府縣
凡法司有所追取不得輒發尚書鄭曉考故事民間詞
訟非自通政司轉達不得聽而諸司有應問罪人必送
刑部各不相侵曉乃言刑部追取人府縣不當却存仁
違制宜罪存仁亦執自下而上之律論曉欺罔乃命在

外者屬有司在京者屬刑部然自曉去位民間詞訟五
城御史輒受之不復遵祖制矣洪武時有告謀反者勘
問不實刑部言當抵罪帝以問秦裕伯對曰元時若此
者罪止杖一百蓋以開來告之路也帝曰姦徒不抵善
人被誣者多矣自今告謀反不實者抵罪學正孫詢訐
稅使孫必貴為訛上又訐元叅政黎銘常自稱老豪傑
謗訛朝廷帝以告訐非儒者所為置不問永樂間定制
誣三四人杖徒五六人流三千里十人以上者凌遲家

屬徒化外洪武末年小民多越訴京師及按其事往往不實乃嚴越訴之禁命老人理一鄉詞訟會里胥決之事重者始白於官然卒不能止越訴者日多乃用重法戍之邊宣德時越訴得實者免罪不實仍戍邊景泰中不問虛實皆發口外充軍後不以為例也登聞鼓洪武元年置於午門外一御史日監之非大寃及機密重情不得擊擊即引奏後移置長安右門外六科錦衣衛輪收以聞旨下校尉領駕帖送所司問理蒙蔽阻遏者罪

龍江衛吏有過罰令書寫值母喪乞守制吏部尚書詹
徽不聽擊鼓訴冤太祖切責徽使吏終喪永樂元年縣
令以贓戍擊鼓陳狀帝為下法司其人言實受贓年老
昏眊所致惟上哀憫帝以其歸誠屈法宥之宣德時直
登聞鼓給事林富言重囚二人七人以姦盜當決擊鼓
訴冤煩瀆不可宥帝曰登聞鼓之設正以達下情何謂
煩瀆自後凡擊鼓訴冤阻遏者罪凡訴告原問官司者
成化間定議覈究得實然後逮問弘治時南京御史王

良臣按指揮周愷等怙勢黷貨愷等遂訐良臣詔下南京法司逮繫會鞠侍郎楊守隨言此與舊章不合請自今以後官吏軍民奏訴牽緣別事撫拾原問官者立案不行所奏事仍令問結虛詐者擬罪原問官枉斷者亦罪乃下其議於三法司法司覆奏如所請從之洪武二十六年以前刑部令主事廳會御史五軍斷事司大理寺五城兵馬指揮使官打斷罪囚二十九年并差錦衣衛官其後惟主事會御史將笞杖罪於打斷廳決訖附

卷奉旨者次日覆命萬厯中刑部尚書孫丕揚言折獄之不速由文移牽制故耳議斷既成部寺各立長單刑部送審掛號次日即送大理大理審允次日即還本部叅差者究處庶事體可一至於打斷相驗令御史三六九日遵例會同餘日止會寺官以速遣徒流以上部寺詳鞫笞杖小罪聽堂部處分命如議行凡獄囚已審錄應決斷者限三日應起發者限十日逾限計日以笞囚淹滯至死者罪徒此舊例也嘉靖六年給事中周瑯言

比者獄吏苛刻犯無輕重概加幽繫案無新故動引歲時意喻色授之間論奏未成囚骨已糜又况偏州下邑督察不及姦吏悍卒倚獄為市或扼其飲食以困之或徙之穢溷以苦之備諸痛楚十不一生臣觀律令所載凡逮繫囚犯老疾必散收輕重以類分枷杻薦蓆必以時飭涼漿暖匣必以時備無家者給之衣服有疾者予之醫藥淹禁有科疏決有詔此祖宗良法美意宜勅臣下同為奉行凡逮繫日月并已竟未竟疾病死亡者各

載文冊申報長吏較其結竟之遲速病故之多寡以為功罪而黜陟之帝深然其言且命中外有用法深刻致戕民命者即斥為民雖才守可觀不得推薦凡內外問刑官惟死罪并竊盜重犯始用拷訊餘止鞭扑常刑酷吏輒用挺棍夾棍腦箍烙鐵及一封書鼠彈箏攔馬棍燕兒飛或灌鼻釘指用徑寸蠟杆不去稜節竹片或鞭脊背兩踝致傷以上者俱奏請罪至充軍停刑之月自立春以後至春分以前停刑之日初一初八十四十五

十八二十三二十四二十八二十九三十凡十日檢驗
屍傷照磨司取部印屍圖一幅委五城兵馬司如法檢
驗府則通判推官州縣則長官親檢毋得委下僚獄囚
貧不自給者洪武十五年定制人給米日一升二十四
年革去正統二年以侍郎何文淵言詔如舊且令有贓
罰敝衣得分給成化十二年令有司買藥餌送部又廣
設惠民藥局療治囚人至正德十四年囚犯煤油藥料
皆設額銀定數嘉靖六年以運炭等有力罪囚折色糴

米上本部倉每年約五百石乃停收歲冬給綿衣褲各一事提牢主事驗給之犯罪籍沒者洪武元年定制自反叛外其餘罪犯止沒田產孳畜二十一年詔謀逆姦黨及造偽鈔者沒貲產丁口以農器耕牛給還之凡應合鈔劄者曰姦黨曰謀反大逆曰姦黨惡曰造偽鈔曰殺一家三人曰採生拆割人為首其大誥所定十條後未嘗用也復讎惟祖父被毆條見之曰祖父母父母為人所殺而子孫擅殺行兇人者杖六十其即時殺死者

勿論其餘親屬人等被人殺而擅殺之者杖一百按律
罪人應死已就拘執其捕者擅殺之罪亦止此則所謂
家屬人等自包兄弟在內其例可類推也凡決囚每歲
朝審畢法司以死罪請旨刑科三覆奏得旨刑科在外
者奏決單於冬至前會審決之正統元年令重囚三覆
奏畢仍請駕帖付錦衣衛監刑官領校尉詣法司取囚
赴市又制臨決囚有訴寃者直登聞鼓給事中取狀封
進仍批校尉手馳赴市曹暫停刑嘉靖元年給事中劉

濟等以囚廖鵬父子及王欽陶杰等頗有內援懼上意
不決乃言往歲三覆奏畢侍駕帖則已日午鼓下仍受
訴詞得報且及未申時及再請始刑時已過酉大非刑
人於市與衆棄之之意請自今決囚在未前畢事從之
七年定議重囚有冤家屬於臨決前一日撾鼓翼日午
前下過午行刑不覆奏南京決囚無刑科覆奏例弘治
十八年南刑部奏決不待時者三人大理寺已審允下
法司議謂在京重囚間有決不待時者審允奏請至刑

科三覆奏或蒙恩仍監候會審南京無覆奏例乞俟秋
後審竟類奏定奪如有巨憝難依常例者更具奏處決
著為令詔可各省決囚永樂元年定制死囚百人以上
者差御史審決弘治十三年定歲差審決重囚官俱以
霜降後至限期復命凡有大慶及災荒皆赦然有常赦
有不赦有特赦十惡及故犯者不赦律文曰赦出臨時
定罪名特免或降減從輕者不在此限十惡中不睦又
在會赦原宥之例此則不赦者亦得原若傳旨肆赦不

別定罪名者則仍依常赦不原之例自仁宗立赦條三十五皆楊士奇代草盡除永樂年間敝政歷代因之凡先朝不便於民者皆援遺詔或登極詔革除之凡以赦前事告言人罪者即坐以所告者罪弘治元年民呂梁山等四人生竊盜殺人死遇赦都御史馬文升請宥死戍邊帝特命依律斬之世宗雖屢停刑尤慎無赦廷臣屢援赦令欲宥大禮大獄暨建言諸臣益持不允及嘉靖十六年同知姜輅酷殺平民都御史王廷相奏當發

口外乃特命如詔書宥免而以違詔責廷相等四十一年三殿成羣臣請頒赦帝曰赦乃小人之幸不允穆宗登極覃恩雖徒流人犯已至配所者皆許放還蓋為遷謫諸臣地也有明一代刑法大概太祖開國之初懲元季貪冒重繩職吏揭諸司犯法者於申明亭以示戒又命刑部凡官吏有犯宥罪復職書過榜其門使自省不悛論如律累頒犯諭戒諭榜諭悉象以刑誥示天下及十八年大誥成序之曰諸司敢不急公而務私者必窮

搜其原而罪之凡三誥所列凌遲梟示種誅者無慮千百棄市以下萬數貴溪儒士夏伯啟叔姪斷指不仕蘇州人才姚潤王謨被徵不至皆誅而籍其家橐中士夫不為君用之科所由設也其三編稍寬容然所記進士監生罪名自一犯至四犯者猶三百六十四人幸不死還職率戴斬罪治事其推原中外貪墨所起以六曹為罪魁郭桓為誅首郭桓者戶部侍郎也帝疑北平二司官吏李或趙全德等與桓為姦利自六部左右侍郎下

皆死賊七百萬詞連直省諸官吏繫死者數萬人覈賊
所寄借偏天下民中之家大抵皆破時咸歸謗御史
余敏丁廷舉或以為言帝乃手詔列桓等罪而論右審
刑吳庸等極刑以厭天下心言朕詔如司除姦顧復生
姦擾吾民今後有如此者遇赦不宥先是十五年空印
事發每歲布政司府州縣吏詣戶部覈錢糧軍需諸事
以道遠豫持空印文書遇部駁即改以為常及是帝疑
有姦大怒論諸長吏死佐貳榜百戍邊海寧人鄭士利

上書訟其冤復杖戍之二獄所誅殺已過當而胡惟庸
藍玉兩獄株連死者且四萬然時引大體有所縱舍沅
陵知縣張傑當輸作自陳母賀當元季亂離守節今
年老失養帝謂可勵俗特赦之秩傑令終養給事中彭
與民坐繫其父為上表訴哀立釋之且免同繫十七人有
死囚妻妾訴夫冤法司請黥之帝以婦為夫訴職也不
罪都察院當囚死者二十四人命羣臣鞠有冤者減數
人死真州民十八人謀不軌戮之而釋其母子當連坐

者所用深文吏開濟詹徽陳寧陶凱輩後率以罪誅之
亦數宣仁言不欲純任刑罰嘗行郊壇皇太子從指道
旁荆楚曰古用此為扑刑取能去風雖寒不傷也尚書
開濟議法密諭之曰竭澤而漁害及鯢鰕焚林而田禍
及麋麇法太巧密民何以自全濟慙謝叅政楊憲欲重
法帝曰求生於重典猶索魚於釜得活難矣御史中丞
陳寧曰法重則人不輕犯吏察則下無遁情太祖曰不
然古人制刑以防惡衛善故唐虞畫衣冠異章服以為

戮而民不犯秦有鑿顛抽脅之刑叅夷之誅而圜圉成
市天下怨叛未聞用商韓之法可致堯舜之治也寧慚
而退又嘗謂尚書劉惟謙曰仁義者養民之膏梁也刑
罰者懲惡之藥石也舍仁義而專用刑罰是以藥石養
人豈得謂善治乎蓋太祖用重典以懲一時而酌中制
以垂後世故猛烈之治寬仁之詔相輔而行未嘗偏廢
也建文帝繼體守文專欲以仁義化民元年刑部報囚
減太祖時十三矣成祖起靖難之師悉指忠臣為姦黨

甚者加族誅掘塚妻女發浣衣局教坊司親黨謫戍者
至隆萬間猶勾伍不絕也抗違者既盡殺戮懼人竊議
之疾誹謗特甚山陽民丁鈺訐其鄉誹謗罪數十人法
司迎上旨言鈺才可用立命為刑科給事中永樂十七
年復申其禁而陳瑛呂震紀綱輩先後用事專以刻深
固寵於是蕭議周新解縉等多無罪死然帝心知苛法
之非間示寬大千戶某灌桐油皮鞭中以決人刑部當
以杖命并罷其職法司奏冒支官糧者命即戮之刑部

為覆奏帝曰此朕一時之怒過矣其依律自今犯罪皆
五覆奏至仁宗性甚仁恕甫即位謂金純劉觀曰卿等
皆國大臣如朕處法失中須更執奏朕不難從善也因
召學士楊士奇楊榮金幼孜至榻前諭曰比年法司之
濫朕豈不知其所擬大逆不道往往出於文致先帝數
切戒之故死刑必四五覆奏而法司畧不加意甘為酷
吏而不愧自今審重囚卿三人必往同讞有冤抑者雖
細故必以聞洪熙改元二月諭都御史劉觀大理卿虞

謙曰往者法司以誣陷為功人或片言及國事輒論誹
謗身家破滅莫復辨理今數月間此風又萌夫治道所
急者求言所患者以言為諱奈何禁誹謗哉因顧士奇
等曰此事必以詔書行之於是士奇承旨載帝言於己
丑詔書云若朕一時過於嫉惡律外用籍沒及凌遲之
刑者法司再三執奏三奏不允至五五奏不允同三公
及大臣執奏必允乃已永為定制文武諸司亦毋得暴
酷用鞭背等刑及擅用宮刑絕人嗣續有自宮者以不

孝論除謀反及大逆者餘犯止坐本身母一切用連坐
法告誹謗者勿治在位未一年仁恩該洽矣宣宗承之
益多惠政宣德元年大理寺駁正猗氏民妻王骨都殺
夫之寃帝切責刑官尚書金純等謝罪乃已義勇軍士
閻羣兒等九人被誣為盜當斬家人擊登聞鼓訴寃覆
按實不為盜命釋羣兒等而切責都御史劉觀其後每
遇奏囚色慘然御膳為廢或以手撒其牘謂左右曰說
與刑官少緩之一日御文華殿與羣臣論古肉刑侍郎

對漢除肉刑人遂輕犯法帝曰此自由教化豈關肉刑
之有無舜法有流宥金贖而四凶之罪止於竄殛可見
當時被肉刑者必皆重罪不濫及也况漢承秦敝挾書
有律若概用肉刑受傷者必多矣明年著帝訓五十五
篇其一恤刑也武進伯朱冕言比遣舍人林寬等送囚
百十七人戍邊到者僅五十人餘皆道死帝怒命法司
窮治之帝寬詔歲下閱囚屢放遣有至三千人者諭刑
官曰吾慮其瘐死故寬貸之非常制也是時官吏納米

百石若五十石得贖雜犯死罪軍民減十之二諸邊衛
十二石遼東二十石於例為太輕然獨嚴賊吏之罰令
文職犯賊者俱依律科斷由是用法輕而貪墨之風亦
不甚恣然明制重朋比之誅都御史夏迪催糧常州御
史何楚英誣以受金諸司懼罪明知其冤不敢白迪竟
充驛夫憤死以帝之寬仁而大臣有冤死者此立法之
弊也英宗以後仁宣之政衰正統初三楊當國猶恪守
祖法禁內外諸司鍛鍊刑獄刑部尚書魏源以災旱上

疑獄請命各巡撫審錄從之無巡撫者命巡按清軍御史行在都察院亦以疑獄上通審錄之御史陳祚言法司論獄多違定律專務刻深如戶部侍郎吳璽舉淫行主事吳軌宜坐貢舉非其人罪乃加以奏事有規避律斬及軌自經死獄官卒之罪明有遞減科乃援不應為事理重者概杖之夫原情以定律祖宗防範至周而法司乃抑輕從重至此非所以廣聖朝之仁厚也今後有妄援重例者請以變亂成法罪之帝是其言為申警戒

至六年王振始亂政數辱廷臣刑章大紊侍講劉球條上十事中言天降災譴多感於刑罰之不中宜一任法司視其徇私不當者而加以罪雖有觸忤如漢犯蹕盜環之事猶當聽張釋之之執奏而從之帝不能用而球即以是疏觸振怒死於獄然諸酷虐事大率振為之帝心頗寬平十一年大理卿俞士悅以毆鬪殺人之類百餘人聞請宥俱減死戍邊景泰中陽穀主簿馬彥斌當斬其子震請代死特宥彥斌編震充邊衛軍大理少卿

薛瑄言法司發擬罪囚多加參語奏請變亂律意詔法
外刑獄全活者甚衆天順中詔獄繁興三法司錦衣衛
多繫囚未決吏往往洩獄情為姦都御史蕭維禎附會
徐有貞枉殺王文于謙等而刑部侍郎劉廣衡即以詐
撰制文坐有貞斬罪其後緹騎四出海內不安然霜降
後審錄重囚實自天順間始至成化初刑部尚書陸瑜
等以請命舉行之獄上杖其情可矜疑者免死發戍列
代奉行人獲沾法外恩矣憲宗之即位也勅三法司中

外文武羣臣除贓罪外所犯罪名紀錄在官者悉與湔
滌其後歲以為常十年當決囚冬至節近特命過節行
刑既而給事中言冬至後行刑非時遂詔俟來年冬月
山西巡撫何喬新劾奏遲延獄詞僉事尚敬劉源因言
凡二司不決斷詞訟者半年之上悉宜奏請執問帝曰
刑獄重事周書曰要囚服念五六日至於旬時特為未
得其情者言耳苟得其情即宜決斷無罪拘幽往往瘐
死是刑官殺之也故律特著淹禁罪囚之條其即以喬

新所奏通行天下又定制凡盜賊贓伏未真人命死傷
未經勘驗輒加重刑致死獄中者審勘有無故失明白
不分軍民職官俱視酷刑事例為民侍郎楊宣妻悍妬
殺婢十餘人部擬命婦合坐者律特命決杖五十時帝
多裨政而於刑獄尤慎之所失惟一二事嘗欲殺一囚
不許覆奏御史方佑復以請帝怒杖謫佑吉安知府許
聰有罪中官黃高嗾法司論斬給事中白昂以未經審
錄為請不聽竟乘夜斬之孝宗初立免應決死罪四十

八人元年知州劉概坐妖言罪斬以王恕爭得長繫末
年刑部尚書閔珪讞重獄忤旨久不下帝與劉大夏語
及之對曰人臣執法效忠珪所為無足異帝曰且道自
古君臣會有此事否對曰臣幼讀孟子見瞽瞍殺人臯
陶執之之語珪所執未可深責也帝頷之明日疏下遂
如擬前後所任司寇何喬新彭韶白昂閔珪皆持法平
者海內翕然頌仁德焉正德五年會審重囚減死者二
人時冤濫滿獄李東陽等因風竄以為言特許寬恤而

刑官懼觸劉瑾怒所上止此後磔流賊趙璲等於市剥
為魁者六人皮法司奏祖訓有禁不聽尋以皮製鞍鐙
帝每騎乘之而廷杖直言之臣亦武宗為甚世宗即位
七月因日精門災理冤抑命再問緩死者者三十八人
而廖鵬王璵齊佐等與馬給事中李復禮等言鵬等皆
江彬錢寧之黨王法所必誅乃令禁之如故後皆次第
伏法自杖諸爭大禮者遂痛折廷臣五年命張璉桂萼
方獻夫攝三法司變李福達之獄欲坐馬錄以姦黨律

楊一清力爭乃戍錄而坐罪者四十餘人璵等以為已
功遂請帝編欽明大獄錄頒示天下是獄所坐大抵璵
三人夙嫌者以祖宗之法供權臣排陷而帝不悟也八
年京師民張福殺母訴為張柱所殺刑部郎中魏應召
覆治得實而帝以柱乃武宗后家僕有意曲殺之命侍
郎許讚盡反讞詞而下都御史熊浹及應召於獄其後
猜忌日甚冤濫者多雖間命寬恤而意主苛刻嘗諭輔
臣近連歲因災異免刑今復當刑科三覆請旨朕思死

刑重事欲將盜陵殿等物及毆罵父母大傷倫理者取決餘令法司再理與卿共論慎之慎之時以為得大體越數年大理寺奉詔讞奏獄囚應減死者帝謂諸囚罪皆不赦乃假借恩例縱姦壞法黜降寺丞以下有差自九年舉秋謝醮免決囚自後或因祥瑞或因郊祀大報停刑之典每歲舉行然屢譴怒執法官以為不時請旨至上迫冬至廢義而市恩也遂削刑部尚書吳山職降調刑科給事中劉三畏等中年益肆誅戮自宰輔夏言

不免至三十七年乃出手諭言司牧者未盡得人任情作威湖廣幼民吳一魁二命枉刑母又就捕情迫無控萬里叩閣以此推之冤抑者不知其幾爾等宜亟體朕心加意矜恤仍通行天下咸使喻之是詔也卹卹乎有哀痛之思焉末年主事海瑞上書觸忤刑部當以死帝持其章不下瑞得長繫穆宗立徐階緣帝意為遺詔盡還諸逐臣優恤死亡縱釋幽繫讀詔書者無不嘆息萬厯初冬月詔停刑者三矣五年九月司禮太監孫得勝

復傳旨奉聖母諭大婚期近命閣臣於三覆奏本擬旨
免刑張居正言祖宗舊制凡犯死鞠問問既明依律棄
市嘉靖末年世宗皇帝因齊醮始有暫免不決之令或
間從御筆所勾量行取決此特近年姑息之弊非舊制
也臣等詳閱諸囚罪狀皆滅絕天理敗傷彝倫聖母獨
見犯罪者身被誅戮之可憫而不知彼所戕害者皆含
冤蓄憤於幽冥之中使不一雪其痛怨恨之氣上干天
和所傷必多今不行刑年復一年充滿囹圄既費閹防

又乖國典其於政體又大謬也給事中嚴用和等亦以
為言詔許之十二年御史屠叔明請釋革除忠臣外親
命自齊黃外方孝孺等連及者俱勘豁帝性仁柔而獨
惡言者自十二年至三十四年內外官杖戍為民者至
百四十人後不復視朝刑辟罕用死囚屢停免云天啟
中酷刑多別見不具論莊烈帝即位誅魏忠賢崇禎二
年欽定逆案凡六等天下稱快然是時承神宗廢弛熹
宗昏亂之後銳意綜理用刑頗急大臣多下獄者矣六

年冬論囚素服御建極殿召閣臣商榷而溫體仁無所
平反陝西華亭知縣徐兆麒抵任七日城陷坐死帝心
憫之體仁不為救十一年南通政徐石麒疏救鄭三俊
因言皇上御極以來諸臣麗丹書者幾千圜扉為滿使
情法盡協猶屬可憐况怵惕於威嚴之下者有將順而
無挽回有揣摩而無補救株連蔓引九死一生豈聖人
惟刑之恤之意哉帝不能納也是年冬以彗見停刑其
事關封疆及錢糧出兵者詔刑部五日具獄十二年御

史魏景琦論囚西市御史高欽舜工部郎中胡璉等十
五人將斬忽中官本清銜命馳免因釋十一人明日景
琦回奏被責下錦衣獄蓋帝以囚有聲寃者停刑請旨
而景琦倉卒不辨故獲罪十四年大學士范復粹疏請
清獄言獄中文武累臣至百四十有奇大可痛不報是
時國事日棘惟用重法以繩羣臣救過不暇而卒無救
於亂亡也

明史卷九十四

欽定四庫全書薈要卷六千六百八十八史部

明史卷九十五

大學士張廷玉等奉 敕修

志第七十一

刑法三

刑法有創之自明不衷古制者廷杖東西廠錦衣衛鎮撫司獄是已是數者殺人至慘而不麗於法踵而行之至末造而極舉朝野命一聽之武夫宦豎之手良可歎

也太祖常與侍臣論待大臣禮太史令劉基曰古者公卿有罪盤水加劍詣請室自裁未嘗輕折辱之所以存大臣之體侍讀學士詹同因取大戴禮及賈誼疏以進且曰古者刑不上大夫以勵廉恥也必如是君臣恩禮始兩盡帝深然之洪武六年工部尚書王肅坐法當笞太祖曰六卿貴重不宜以細故辱命以俸贖罪後羣臣星誤許以俸贖始此然永嘉侯朱亮祖父子皆鞭死工部尚書夏祥斃杖下故上書者以大臣當誅不宜加辱

為言廷杖之刑亦自太祖始矣宣德三年怒御史嚴暄
方鼎何傑等沈湎酒色久不朝參命枷以徇自此言官
有荷校者至正統中王振擅權尚書劉中敷侍郎吳璽
陳瑞祭酒李時勉率受此辱而殿陛行杖習為故事矣
成化十五年汪直誣陷侍郎馬文昇都御史年俸等詔
責給事御史李俊王濬輩五六人容隱廷杖人二十正
德十四年以諫止南巡廷杖舒芬黃鞏等百四十六人
死者十一人嘉靖三年羣臣爭大禮廷杖豐熙等百三

十四人死者十六人中年刑法益峻雖大臣不免笞辱

宣大總督翟鵬薊州巡撫朱方以撤防早宣大總督郭

宗臯大同巡撫陳燿以敵入大同刑部侍郎彭黯左都

御史屠僑大理卿沈良才以議丁汝夔獄緩戎政侍郎

蔣應奎左通政唐國相以子弟冒功皆逮杖之方燿斃

於杖下而黯僑良才等杖畢趣治事公卿之辱前此未

有又因正旦朝賀怒六科給事中張思靜等皆朝服予

杖天下莫不駭然四十餘年間杖殺朝士倍蓰前代萬

歷六年以爭張居正奪情杖吳中行等五人其後盧洪春孟養浩王德完輩咸被杖多者至一百後帝益厭言者疏多留中廷杖寢不用天啟時太監王體乾奉敕大審重笞戚畹李承恩以悅魏忠賢於是萬燝吳裕中斃於杖下臺省力爭不得閣臣葉向高言數十年不行之敝政三見於旬日萬萬不可再行忠賢乃罷廷杖而以前所欲殺者悉下鎮撫司士大夫益無噍類矣南京行杖始於成化十八年南御史李珊等以歲祲請振帝摘其

疏中訛字令錦衣衛詣南京午門前人杖二十守備太監監之至正德間南御史李熙劾貪吏觸怒劉瑾矯旨杖三十時南京禁衛久不行刑選卒習數日乃杖之幾斃東廠之設始於成祖錦衣衛之獄太祖嘗用之後已禁止其復用亦自永樂時廠與衛相倚故言者竝稱廠衛初成祖起北平刺探宮中事多以建文帝左右為耳目故即位後專倚宦官立東廠於東安門北令嬖暱者提督之緝訪謀逆妖言大奸惡等與錦衣衛均權勢蓋

遷都後事也然衛指揮紀綱門達等大幸更迭用事廠
權不能如至憲宗時尚銘領東廠又別設西廠刺事以
汪直督之所領緹騎倍東廠自京師及天下旁午偵事
雖王府不免直中廢復用先後凡六年寃死者相屬勢
遠出衛上會直數出邊監軍大學士萬安乃言大宗建
北京命錦衣官校緝訪猶恐外官徇情故設東廠令內
臣提督行五六十一年事有定規往者妖狐夜出人心驚
惶感勞聖慮添設西廠特命直督緝用戒不虞所以權

一時之宜慰安人心也向所紛擾臣不贅言今直鎮大
同京城衆口一辭皆以革去西廠為便伏望聖恩特旨
革罷官校悉回原衛宗社幸甚帝從之尚銘專用事未
幾亦黜弘治元年員外郎張倫請廢東廠不報然孝宗
仁厚廠衛無敢橫司廠者羅祥楊鵬奉職而已正德元
年殺東廠大監王岳命邱聚代之又設西廠以命谷大
用皆劉瑾黨也兩廠爭用事遣邏卒刺事四方南康吳
登顯等戲競渡龍舟身死家籍遠州僻壤見鮮衣怒馬

作京師語者轉相避匿有司聞風密行賄賂於是無賴子乘機為奸天下皆重足立而衛使石文義亦瑾私人廠衛之勢合矣瑾又改惜薪司外薪廠為辦事廠榮府舊倉地為內辦事廠自領之京師謂之內行廠雖東西廠皆在伺察中加酷烈焉且創例罪無輕重皆決杖永遠戍邊或枷項發遣枷重至百五十斤不數日輒死尚寶卿顧濬副使姚祥工部郎張瑋御史王時中輩竝不免瀕死而後請戍御史柴文顯汪澄以微罪至凌遲官

吏軍民非法死者數千瑾誅西廠內行廠俱革獨東廠如故張銳領之與衛使錢寧竝以緝事恣羅織廠衛之稱由此著也嘉靖二年東廠芮景賢任千戶陶淳多所誣陷給事中劉最執奏謫判廣德州御史黃德用使乘傳往會有顏如環者同行以黃袂裹裝景賢即奏逮下獄最等編戍有差給事中劉濟言最罪不至戍且緝執於宦寺之門鍛鍊於武夫之手裁決於內降之旨何以示天下不報是時盡罷天下鎮守太監而大臣徂故事

謂東廠祖宗所設不可廢不知非太祖制也然世宗馭中官嚴不敢恣廠權不及衛使陸炳遠矣萬厯初馮保以司禮兼廠事建廠東上北門之北曰內廠而以初建者為外廠保與張居正興王大臣獄欲族高拱衛使朱希孝力持之拱得無罪衛猶不大附廠也中年礦稅使數出為害而東廠張誠孫暹陳矩皆恬靜矩治妖書獄無株濫時頗稱之會帝亦無意刻核刑罰用稀廠衛獄中至生青草及天啟時魏忠賢以秉筆領廠事用衛使

田爾耕鎮撫許顯純之徒專以酷虐鉗中外而廠衛之毒極矣凡中官掌司禮監印者其屬稱之曰宗主而督東廠者曰督主屬無專官掌刑千戶主東廠一理刑百戶一亦謂之貼刑皆衛官其隸役悉取給於衛最輕黥獮巧者乃撥充之役長日檔頭帽上銳衣青素襪褶繫小條白皮靴專主伺察其下番子數人為幹事京師亡命誑財挾讐視幹事者為窟穴得一陰事由之以密白於檔頭檔頭視其事大小先予之金事曰起數金曰買

起數既得事帥番子至所犯家左右坐曰打樁番子即突入執訊之無有左證符牒賄如數徑去少不如意撈治之名曰乾醪酒亦曰搬罾兒痛楚十倍官刑且授意使牽有力者有力者予多金即無事或靳不予予不足立聞上下鎮撫司獄立死矣每月旦廠役數百人制簽庭中分瞰官府其視中府諸處會審大獄北鎮撫司考訊重犯者曰聽記他官府及各城門訪緝曰坐記某官行某事某城門得某奸胥吏疏白坐記者上之廠曰打

事件至東華門雖夤夜投隙中以入即屏人達至尊以
故事無大小天子皆得聞之家人米鹽猥事宮中或傳
為笑謔上下惴惴無不畏打事件者衛之法亦如厰然
須具疏乃得上聞以此其勢不及厰遠甚有四人夜飲
密室一人酒酣謾罵魏忠賢其三人噤不敢出聲罵未
訖番子攝四人至忠賢所即磔罵者而勞三人金三人
者魄喪不敢動莊烈帝即位忠賢伏誅而王體乾王永
祚鄭之惠李承芳曹化淳王德化王之心王化民齊本

正等相繼領厰事告密之風未嘗息也之心化淳叙緝
奸功廕弟姪錦衣衛百戶而德化及東厰理刑吳道正
等偵閣臣薛國觀陰事國觀由此死時衛使惛厰威已
久大抵俛首為所用崇禎十五年御史楊仁愿言高皇
帝設官無所謂緝事衙門者臣下不法言官直糾之無
陰許也後以肅清輦轂乃建東厰臣待罪南城所閱詞
訟多以假番故訴寃夫假稱東厰害猶如此況其真乎
此由積重之勢然也所謂積重之勢者功令比較事件

番役每懸價以買事件受買者至誘人為奸盜而賣之
番役不問其從來誘者分利去矣挾忿首告誣以重法
挾者志無不逞矣伏願寬東廠事件而後東廠之比較
可緩東廠之比較緩而後番役之買事件與賣事件者
俱可息積重之勢庶幾可稍輕後復切言緹騎不當遣
帝為諭東廠言所緝止謀逆亂倫其作奸犯科自有司
存不宜緝并戒錦衣校尉之橫索者然帝倚廠衛益甚
至國亡乃已錦衣衛獄者世所稱詔獄也古者獄訟掌

於司寇而已漢武帝始置詔獄二十六所歷代因革不
常五代唐明宗設侍衛親軍馬步軍都指揮使乃天子
自將之名至漢有侍衛司獄凡大事皆決焉明錦衣衛
獄近之幽繫慘酷害無甚於此者太祖時天下重罪逮
至京者收繫獄中數更大獄多使斷治所誅殺為多後
悉焚衛刑具以囚送刑部審理二十六年申明其禁詔
內外獄毋得上錦衣衛大小咸經法司成祖幸紀綱令
治錦衣親兵復典詔獄綱遂用其黨莊敬袁江王兼李

春等緣借作奸數百千端久之族網而錦衣典詔獄如故廢洪武詔不用矣英宗初理衛事者劉勉徐恭皆謹飭而王振用指揮馬順流毒天下初李時勉殺劉球皆順為之景帝初有言官校緝事之弊者帝切責其長令所緝送法司有誣罔者重罪英宗復辟召李賢屏左右問時政得失賢因極論官校提人之害帝然其言陰察皆實乃召其長戒之已緝弋陽王敗倫事虛復申戒之而是時指揮門達鎮撫逮杲怙寵賢亦為羅織者數矣

達遣旗校四出杲又立程督併以獲多為主千戶黃麟之廣西執御史吳禎至索獄具二百餘副天下朝覲官陷罪者甚衆杲死達兼治鎮撫司構指揮使袁彬繫訊之五毒更下僅免朝官楊璉李蕃韓祺李觀包瑛張祚諫萬鍾輩皆銀鐺就逮寃號道路者不可勝記蓋白紀綱誅其徒稍戢至正統時復張天順之末禍益熾朝野相顧不自保李賢雖極言之不能救也鎮撫司職理獄訟初止立一司與外衛等洪武十五年添設北司而以

軍匠諸職掌屬之南鎮撫司於是北司專理詔獄然大獄經訊即送法司擬罪未嘗具獄詞成化元年始令覆奏用參語法司益掣肘十四年增鑄北司印信一切刑獄毋關白本衛即衛所行下者亦徑自上請可否衛使毋得與聞故鎮撫職卑而其權日重初衛獄附衛治至門達掌問刑又於城西設獄舍拘繫狼籍達敗用御史呂洪言毀之成化十年都御史李賓言錦衣鎮撫司累獲妖書圖本皆誕妄不經之言小民無知輒被幻惑乞

備錄其書名目榜示天下使知畏避免陷刑辟報可緝
事者誣告猶不止十三年捕寧晉人王鳳等誣與瞽者
受妖書署偽職并誣其鄉官知縣薛方通判曹鼎與通
謀發卒圍其家榜掠誣伏方鼎家人數聲寃下法司驗
得實坐妄報妖言當斬帝戒以不得戕害無辜而已不
能罪也是年令錦衣衛副千戶吳綬於鎮撫司同問刑
綬性狡險附汪直以進後知公議不容凡文臣非罪下
獄者不復加箠楚忤直意黜去是時惟衛使朱驥持法

平治妖人獄無寃者詔獄下所司獨用小杖嘗命中使詰責不為改世以是稱之弘治十三年詔法司凡厥衛所送囚犯從公審究有枉即與辨理勿拘成案正德時衛使石文義與張綵表裏作威福時稱為劉瑾左右翼然文義常侍瑾不治事治事者高得林瑾誅文義伏誅得林亦罷其後錢寧管事復大怒以叛誅世宗立革錦衣傳奉官十六汰旗校十五復諭緝事官校惟察不軌妖言人命強盜重事他詞訟及在外州縣事毋得與未

幾事多下鎮撫鎮撫結內侍多巧中會太監崔文奸利
事發下刑部尋以中旨送鎮撫司尚書林俊言祖宗朝
以刑獄付法司事無大小皆聽平鞠自劉瑾錢寧用事
專任鎮撫司文致冤獄法紀大壞更化善治在今日不
宜復以小事撓法不聽俊復言此途一開恐後有重情
即夤緣內降以圖免實長亂階御史曹懷亦諫曰朝廷
專任一鎮撫法司可以空曹刑官為冗員矣帝俱不聽
六年侍郎張璁等言祖宗設三法司以糾官邪平獄訟

設東廠錦衣衛以緝盜賊詰奸宄自今貪官寃獄仍責法司其有徇情曲法乃聽廠衛覺察盜賊奸宄仍責廠衛亦必送法司擬罪詔議如行然官校提人恣如故給事中蔡經等論其害願罷勿遣尚書胡世寧請從其議詹事霍韜亦言刑獄付三法司足矣錦衣衛復橫撓之昔漢光武尚名節宋太祖刑法不加衣冠其後忠義之徒爭死效節夫士大夫有罪下刑曹辱矣有重罪廢之誅之可也乃使官校衆執之脫冠裳就桎梏朝列清班

暮幽犴獄剛心壯氣銷折殆盡及覆案非罪即冠帶立
朝班武夫捍卒指目之曰某吾辱之某吾繫執之小人
無所忌憚君子遂致易行此豪傑所以興山林之思而
變故罕仗節之士也願自今東廠勿與朝儀錦衣衛勿
典刑獄士大夫罪謫廢誅勿加笞杖鎖梏以養廉恥振
人心勵士節帝以韜出位妄言不納祖制凡朝會廠衛
率屬及校尉五百名列侍奉天門下糾儀凡失儀者即
褫衣冠執下鎮撫司獄杖之乃免故韜言及之迨萬厯

時失儀者始不付獄罰俸而已世宗銜張鶴齡延齡奸人劉東山等乃誣二人毒魔咒詛帝大怒下詔獄東山因株引素所不快者衛使王佐探得其情論以誣罔法反坐佐乃枷東山等闕門外不及旬悉死人以佐比年斌年斌者弘治中指揮也李夢陽論延齡兄弟不法事下獄斌傳輕比得不死云世宗中年衛使陸炳為忤與嚴嵩比而傾夏言然帝數興大獄而炳多保全之故士大夫不疾炳萬厯中建言及忤礦稅璫者輒下詔獄刑

科給事中楊應文言監司守令及齊民被逮者百五十
餘人雖已打問未送法司獄禁森嚴水火不入疫癘之
氣充斥圉圉衛使駱思恭亦言熱審歲舉俱在小滿前
今二年不行鎮撫司監犯且二百多拋瓦聲冤鎮撫司
陸逵亦言獄囚怨恨有持刀斷指者俱不報然是時告
訐風衰大臣被錄者寡其末年稍寬逮繫諸臣而錦衣
獄漸清矣田爾耕許顯純在熹宗時為魏忠賢義子其
黨孫雲鶴楊寰崔應元佐之拷楊漣左光斗輩坐賊比

較立限嚴督之兩日為一限輸金不中程者受全刑全
刑者曰械曰鐐曰棍曰拶曰夾棍五毒備俱呼晷聲沸
然血肉潰爛宛轉求死不得顯純叱咤自若然必伺忠
賢旨忠賢所遣聽記者未至不敢訊也一夕令諸囚分
舍宿於是獄卒曰今夕有當壁挺者壁挺獄中言死也
明日漣死光斗等次第皆鎖頭拉死每一人死停數日
葦席裏尸出牢戶蟲蛆腐體獄中事秘其家人或不知
死日莊烈帝禽戮逆黨冤死家子弟望獄門稽顙哀號

為文以祭帝聞之惻然自劉瑾創立枷錦衣獄常用之
神宗時御史朱應轂具言其慘請除之不聽至忠賢益
為大枷又設斷脊墮指刺心之刑莊烈帝問左右立枷
何為王體乾對曰以罪巨奸大慙耳帝愀然曰雖如此
終可憫忠賢為頸縮東廠之禍至忠賢而極然廠衛未
有不相結者獄情輕重廠能得於內而外廷有扞格者
衛則東西兩司房訪緝之北司拷問之鍛鍊周內始送
法司即東廠所獲亦必移鎮撫再鞫而後刑部得擬其

罪故厰勢強則衛附之厰勢稍弱則衛反氣凌其上陸炳緝司禮李彬東厰馬廣陰事皆至死以炳得內閣嵩意及後中官愈重閣勢日輕閣臣反比厰為之下而衛使無不競趨厰門甘為役隸矣錦衣衛陞授勲衛任子科目功升凡四途嘉靖以前文臣子弟多不屑就萬厯初劉守有以名臣子掌衛其後皆樂居之士大夫與往還獄急時頗賴其力守有子承禧及吳孟明其著者也莊烈帝疑羣下王德化掌東厰以慘刻輔之孟明掌衛

印時有縱舍然觀望厥意不敢違而鎮撫梁清宏喬可用朋比為惡凡縉紳之門必有數人往來踪跡故常晏起早闔母敢偶語旗校過門如被大盜官為囊橐均分其利京城中奸細潛入傭夫販子陰為流賊所遣無一舉發而高門富豪跼蹐無寧居其徒黠者恣行請託稍拂其意飛誣立構摘竿牘片字株連至十數人姜埰熊開元下獄帝諭掌衛駱養性潛殺之養性洩上語且言二臣當死宜付所司書其罪使天下明知若陰使臣殺

之天下後世謂陛下何如主會大臣多為採等言遂得
長繫此養性之可稱者然他事肆虐亦多矣錦衣舊例
有功賞惟緝不軌者當之其後冒濫無紀所報百無一
實吏民重困而廠衛題請輒從隆慶初給事中歐陽一
敬極言其弊言緝事員役其勢易逞而又各類計所獲
功次以為陞授則憑可逞之勢邀必獲之功枉人利己
何所不至有盜經出首倖免故令多引平民以充數者
有括家囊為盜賊挾市豪以為證者有潛構圖書懷挾

偽批用妖言假印之律相誣陷者或姓名相類朦朧見
收父訴子孝坐以忤逆所以被訪之家諺稱為剗毒害
可知矣乞自今定制機密重情事干憲典者廠衛如故
題請其情罪不明未經讞審必待法司詳擬成獄之後
方與紀功仍敕兵刑二部勘問明白請旨陞賞或經緝
拿未成獄者不得虛冒比擬及他詞訟不得概涉以侵
有司之事如獄未成而官校及鎮撫司拷打傷重或至
死者許法司參治法司容隱扶同則聽科臣并參如此

則功必覆實訪必當事而刑無冤濫時不能用也內官
同法司錄囚始於正統六年命何文淵王文審行在疑
獄敕同內官與安周忱郭瑾往南京敕亦如之時雖未
定五年大審之制而南北內官得與三法司刑獄矣景
泰六年命太監王誠會三法司審錄在京刑獄不及南
京者因災創舉也成化八年命司禮太監王高少監宋
文毅兩京會審而各省恤刑之差亦以是歲而定十七
年辛卯命太監懷恩同法司錄囚其後審錄必以丙辛

之歲弘治九年不遣內官十三年以給事中邱俊言復
命會審凡大審錄齋敕張黃蓋於大理寺為三尺壇中
坐三法司左右坐御史郎中以下捧牘立唯諾趨走惟
謹三法司視成案有所出入輕重俱視中官意不敢忤
也成化時會審有弟助兄鬪因毆殺人者太監黃賜欲
從末減尚書陸瑜等持不可賜曰同室鬪者尚被髮纓
冠救之況其兄乎瑜等不敢難卒為屈法萬厯三十四
年大審御史曹學程以建言久繫羣臣請宥皆不聽刑

部侍郎沈應文署尚書事合院寺之長以書抵太監陳矩請寬學程罪然後會審獄具署名同奏矩復密啟言學程母老可念帝意解釋之其事甚美而監權之重如此錦衣衛使亦得與法司午門外鞠囚及秋後承天門外會審而大審不與也每歲決囚後圖諸囚罪狀於衛之外垣令人觀省內臣曾奉命審錄者死則於墓寢畫壁南面坐旁列法司堂上官及御史刑部郎引囚鞠躬聽命狀示後世為榮觀焉成化二年命內官臨斬強盜

宋全嘉靖中內臣犯法詔免逮問唯下司禮監治刑部
尚書林俊言宮府一體內臣所犯宜下法司明正其罪
不當廢祖宗法不聽按太祖之制內官不得識字預政
備掃除之役而已末年焚錦衣刑具蓋示永不復用而
成祖違之卒貽子孫之患君子惜焉

明史卷九十五

欽定四庫全書薈要卷六千六百八十九 史部

明史卷九十六

大學士張廷玉等奉 勅修

志第七十二

藝文一

明太祖定元都大將軍收圖籍致之南京復詔求四方遺書
設秘書監丞尋改翰林典籍以掌之永樂四年帝御便殿
閱書史問文淵閣藏書解縉對以尚多闕畧帝曰士庶家稍

有餘資尚欲積書況朝廷乎遂命禮部尚書鄭賜遣使購惟
其所欲與之勿較值北京既建詔修撰陳循取文淵閣書一部
至百部各擇其一得百櫃運致北京宣宗嘗臨視文淵閣
親披閱經史與少傅楊士奇等討論因賜士奇等詩是時秘
閣貯書約二萬餘部近百萬卷刻本十三抄本十七正統間
士奇等言文淵閣所貯書籍有祖宗御製文集及古今經史
子集之書向貯左順門北廊今移于文淵閣東閣臣等逐一
點勘編成書目請用寶鈐識永久藏棄制曰可正德十一年

大學士梁儲等請檢內閣并東閣藏書殘闕者令原管
主事李繼先等次第修補先是秘閣書籍皆宋元所遺
無不精美裝用倒摺四周外向蟲鼠不能損迄流賊之
亂宋刻元鐫胥歸殘闕至明御製詩文內府鏤板而儒
臣奉勅修纂之書及象魏布告之訓卷帙既夥文藻復
優當時頒行天下外此則名公卿之論撰騷人墨客一
家之言其工者深醇大雅卓卓可傳即有怪竒駁雜出
乎其間亦足以考風氣之正變辨古學之源流識大識

小掌故備焉挹其華實無讓前徽可不謂文運之盛歟
四部之目昉自荀勗晉宋以來因之前史兼錄古今載
籍以為皆其時柱下之所有也明萬厯中修撰焦竑修
國史輯經籍志號稱詳博然延閣廣內之藏竑亦無從
編覽則前代陳編何憑紀錄區區掇拾遺文異以上承
隋志而廣書錯刻徒滋譌舛故今第就二百七十年各
家著述稍為釐次勒成一志凡卷數莫考疑信未定者
寧闕而不詳云

經類十一曰易類二曰書類三曰詩類四曰禮類五曰

樂類六曰春秋類七曰孝經類八曰諸經類九曰四書

類十曰小學類朱升周易旁注前圖二卷周易旁注十

卷梁寅周易叅義十二卷趙汸大易文銓八卷鮑洵大

易舉隅三卷

又名大易鈎元

林大同易經奧義二卷歐陽貢周

易問辨三十卷朱謐易學啟蒙述解二卷張洪周易傳

義會通十五卷程汝器周易集傳十卷永樂中勅修周

易傳義大全二十四卷義例一卷

胡廣等纂

楊士奇周易直

指十卷劉髦石潭易傳撮要一卷林誌周易集說三卷
李賢讀易記一卷劉定之周易圖釋三卷王恕玩易意
見二卷羅倫周易說旨四卷談綱讀易愚慮二卷易攷
圖義一卷卜筮節要一卷易經雜言一卷易指攷辨一
卷蔡清周易蒙引二十四卷朱綬易經精蘊二十四卷
何孟春易疑初筮告蒙約十二卷胡世寧讀易私記四
卷陳鳳梧集定古易十二卷劉玉執齋易圖說一卷許
誥圖書管見一卷周用讀易日記一卷崔銑讀易餘言

五卷易大象說一卷湛若水修復古易經傳訓測十卷

張邦奇易說一卷鄭善夫易論一卷呂柟周易說翼三

卷王崇慶周易議卦二卷唐龍易經大旨四卷韓邦奇

易學啟蒙意見四卷

一名易學疏原

易占經緯四卷鍾芳學易

疑義三卷王道周易億四卷梅驚古易攷原三卷金賁

亨學易記五卷舒芬易箋問一卷季本易學四同八卷

圖文餘辨一卷著法別傳一卷古易辨一卷林希元易

經存疑十二卷陳琛易經通典六卷

一名淺說

方獻夫周易

約說十二卷余誠易圖說一卷黃片易圖識漏一卷李

舜臣易卦辱言一卷葉良珮周易義叢十六卷豐坊古

易世學十五卷

坊云家有古易傳白逸祖豐稷又有古書世學六卷言得朝鮮倭國二本合於

今文古文石經古本魯詩世學三十六卷亦如豐稷所傳時論以為皆坊偽撰也

唐樞易修墨

守一卷羅洪先易解一卷楊爵周易辨錄四卷薛甲易

象大旨八卷熊過周易象旨決錄七卷胡經易演義十

八卷王畿大象義述一卷盧翰古易中說四十四卷陳

言易疑四卷陳士元易象鉤解四卷易象彙解二卷魯

邦彥圖書就正錄一卷李贄九正易因四卷

贄自謂初著易因一

書改至八九次而後定故有九正之名

徐師曾今文周易演義十二卷姜

寶周易補疑十二卷顧曾唯周易詳蘊十三卷孫應鰲

易談四卷鄧元錫易經繹五卷顏鯨易學義林十卷陳

錫易原一卷王世懋易解一卷徐元氣周易詳解十卷

萬廷言易說四卷易原四卷楊時喬周易古今文全書

二十一卷來知德周易集註十六卷任惟賢周易義訓

十卷張獻翼讀易韻考七卷曾士傳正易學啟蒙一卷

葉山八白易傳十六卷金瑤六爻原意一卷李逢期易
經隨筆二卷方社昌周易指要三卷孫從龍周易叅疑
十卷沈一貫易學十二卷馮時可易說一卷唐鶴徵周
易象義四卷黃正憲易象管窺十五卷郭子章易解五
五卷吳中立易詮古本三卷周坦易圖說一卷朱篁易
邨七卷朱謀埜易象通八卷陳第伏羲圖贊二卷鄧伯
羔古易詮二十九卷今易詮二十四卷傅文兆義經十
一翼五卷林兆思易外別傳一卷王宇周易占林四卷

彭好古易鑰五卷方時化易疑一卷易引九卷周易頌
二卷學易述談四卷章潢周易象義十卷姚舜牧易經
疑問十二卷顏素易研六卷曾朝節易測十卷鄒元標
易說通一卷徐三重易義一卷蘇濬周易冥冥篇四卷
易經兒說四卷沈孚聞周易日鈔十一卷屠隆讀易便
解四卷楊啟新易林疑說二卷鍾化民讀易鈔十四卷
李廷機易經纂注四卷易答問四卷鄒德溥易會八卷
錢一本像象管見七卷易象鈔續鈔共六卷四聖一心

錄四卷潘士藻洗心齋讀易述十七卷岳元聲易說三
卷顧允成易圖說億言四卷焦竑易筌六卷高攀龍大
易易簡說三卷周易孔義一卷郝敬周易正解二十卷
易韻四卷問易補七卷學易枝言二卷張納陞學易飲
河八卷吳絅周易繹旨八卷萬尚烈易贊測一卷易大
象測一卷吳默易說六卷姚文蔚周易旁注會通十四
卷李本固古易彙編意辭集十七卷楊廷筠易顯六卷
湯賓尹易經翼註四卷孫慎行周易明洛義纂述六卷

不語易義二卷曹學佺周易可說七卷張汝震周易因
指八卷崔師訓大成易旨二卷劉宗周周易古文鈔三
卷讀易圖記三卷薛三省易蠱二卷程汝繼周易宗義
十二卷王三善周易象注九卷魏濟周易古象通八卷
樊良樞易疑一卷易象二卷高捷易學象辭二集十二
卷陸振奇易芥十卷楊瞿畧易林疑說十卷王納諫周
易翼註三卷陸夢龍易畧三卷文翔鳳邵窩易詁一卷
卓爾康易學全書五十卷繆昌期周易會通十二卷羅

喻義讀易內篇問篇外篇共七卷程玉潤周易演旨六
十五卷錢士升易揆十二卷錢繼登易簣三卷吳極易
學五卷方孔炤周易時論十五卷徐世淳易就六卷汪
邦注周易會通十二卷葉憲祖大易玉匙六卷方鯤易
盪二卷鮑觀白易說二卷張伯樞易象大旨三卷吳桂
森像象述五卷鄭維嶽易經意言六卷喻有功周易懸鏡
七卷潘士龍演易圖說一卷洪守美易說醒四卷余叔
純周易讀五卷陸起龍周易易簡編四卷徐奇周易

卦義二卷洪化昭周易獨生談五卷沈瑞鍾周易廣筌
二卷林有桂易經觀理說四卷陳履祥孔易說一卷許
順義易經三注粹鈔四卷王祚昌周易敬書五卷容若
春今易圖學心法釋義十卷張次仲周易玩辭困學記
十二卷顧樞西疇易稿三卷陳仁錫義經易簡錄八卷
黃道周易象正十四卷三易洞璣十六卷倪元璐兒易
內儀六卷外儀十五卷龍文光乾乾篇三卷文安之易
備十四卷林允昌周易耨義六卷張鏡心易經增注十

二卷李奇玉易義四卷朱之後周易纂六卷何楷古周易訂詁十六卷沈允培易解三卷黎遂球周易文物當名二卷鄭賡唐讀易鬼十二卷陳際泰易經大意七卷羣經補易說一卷周易翼簡捷解十六卷秦鏞易序圖說二卷金鉉易說一卷黃端伯易疏五卷來集之讀易圖通二卷

古易類凡二百二十二部一千五百七十卷

明太祖注尚書洪範一卷

帝嘗命儒臣書洪範揭於御座之石因自為注

仁宗

體尚書二卷

釋尚書中皋陶謨甘誓盤庚等十六篇以講解更其原文世宗書經三

要三卷

帝以太祖有注洪範一篇因注無逸再注伊訓分三冊共為一書已乃製洪範序畧一篇復將

皋陶謨伊訓無逸等篇通加注釋名曰書經三要

洪武中敕修書傳會選六卷

太祖以蔡沈書傳有得有失詔劉三吾等訂正之又集諸家之說足其未備書成頒刻然世竟鮮行永樂中修大全一依蔡傳取便於士子舉業此外不復有所考究也朱升尚書旁注六卷書傳

補正輯註一卷梁寅書纂義十卷朱右書集傳發揮十

卷禹貢凡例一卷徐蘭書經體要一卷陳雅言尚書卓

躍六卷郭元亮尚書該義十六卷永樂中敕修書傳大

全十卷

胡廣等纂

張洪尚書補傳十二卷彭勗書傳通釋六

卷徐善述尚書直指六卷陳濟書傳補注一卷徐驥洪

範解訂正一卷章厥書經提要四卷費希冉尚書本旨

七卷楊守陳書私鈔一卷黃瑜書經旁通十卷李承恩

書經拾蔡二卷楊廉洪範纂要一卷熊宗立洪範九疇

數解八卷張邦奇書說一卷吳世忠洪範考疑一卷鄭

善夫洪範論一卷劉天民洪範辨疑一卷馬明衡尚書

疑義一卷呂柟尚書說疑五卷韓邦奇禹貢詳畧二卷

王崇慶書經說畧一卷舒芬書論一卷鄭曉尚書考二
卷禹貢圖書一卷馬森書傳數言十卷張居正書經直
解八卷王樵尚書日記十六卷書帷別記四卷陳錫尚
書經傳別解一卷歸有光洪範傳一卷考定武成一卷
程宏寶書經虹臺講義十二卷屠本峻尚書別錄六卷
鄧元錫尚書繹二卷章潢尚書圖說三卷陳第尚書疏
衍四卷羅敦仁尚書是正二十卷鍾庚陽尚書傳心錄
七卷王祖嫡書疏叢鈔一卷瞿九思書經以俟錄六卷

姚舜牧書經疑問十二卷劉應秋尚書旨十卷郭正域

東宮進講尚書義一卷錢一本範衍十卷袁宗道尚書

纂注四卷焦竑禹貢解一卷吳炯書經質疑一卷王肯

堂尚書要旨三十一卷郝敬尚書辨解十卷盧廷選尚

書雅言六卷曹學佺書傳會衷十卷謝廷讚書經翼注

七卷趙維寰尚書蠡四卷陸鍵尚書傳翼十卷張爾嘉

尚書貫言二卷姜逢元禹貢詳節一卷朱道行尚書集

思通十二卷史唯堡尚書晚訂十二卷楊肇芳尚書副

墨六卷潘士遴尚書葦籥五十卷徐大儀書經補注六
卷黃道周洪範明義四卷鄭鄮禹貢注一卷艾南英禹
貢圖注一卷傅元初尚書撮義四卷袁儼尚書百家彙
解六卷江旭奇尚書傳翼二卷朱朝瑛讀書畧記二卷
茅瑞徵虞書箋二卷禹貢滙疏十二卷王綱振禹貢逆
志一卷張能恭禹貢訂傳一卷黃翼登禹貢注刪一卷
夏允彝禹貢古今合注五卷羅喻義洪範直解一卷讀
範內篇一卷

右書類八十八部凡四百九十七卷

周是修詩小序集成三卷梁寅詩演義八卷詩考四卷

朱升詩旁注八卷汪克寬詩集傳音義會通三十卷曾

堅詩疑大鳴錄一卷朱善詩解頤四卷高順詩集傳解

二十卷張洪詩正義十五卷楊禹錫詩義二卷鄭旭詩

經總旨一卷永樂中敕修詩集傳大全二十卷

湖廣
等纂范

理詩集解三十卷王逢詩經講說二十卷孫鼎詩集詩

說四卷李賢讀詩紀一卷楊守陳詩私鈔四卷易貴詩

經直指十五卷程楷詩經講說二十卷陸深儼山詩徵
二卷張邦奇詩說一卷湛若水詩釐正二十卷呂柟毛
詩序說六卷胡纘宗胡氏詩識三卷王崇慶詩經衍義
一卷季本詩說解頤八卷總論二卷黃佐詩傳通解二
十五卷潘恩詩經輯說七卷陸垹詩傳存疑一卷薛應
旂方山詩說八卷陳錫詩辨疑一卷勞堪詩林伐柯四
卷沈一貫詩經纂注四卷馮時可詩億二卷郭于章詩
傳書例四卷朱得之印古詩說一卷袁仁毛詩或問二

卷鄧元錫詩繹三卷陳第毛詩古音考四卷朱謀瑋詩

故十卷凌蒙初聖門傳詩嫡家十六卷詩逆四卷陶其

情詩經注疏大全纂十二卷趙一元詩經理解十四卷

黃一正詩經埤傳八卷馮復京六家詩名物疏五十五

卷吳雨毛詩鳥獸草木疏三十卷唐汝諤毛詩微言二

十卷瞿九思詩經以俟錄六卷姚舜牧詩經疑問十二

卷林兆珂毛詩多識篇七卷汪應蛟學詩畧一卷徐常

吉毛詩翼說五卷吳炯詩經質疑一卷郝敬毛詩原解

三十六卷序說八卷張彩詩原三十卷徐必達南州詩
說六卷劉憲寵詩經會說八卷曹學佺詩經質疑六卷
沈萬鈞詩經類考三十卷顧起元爾雅堂詩說四卷蔡
毅中詩經補傳四卷沈守正詩經說通十四卷樊良樞
詩商五卷徐光啟毛詩六帖六卷趙琮葩經約說十卷
莊廷臣詩經逢源八卷鄒忠允詩傳闡二十四卷陸化
熙詩通四卷胡允嘉讀詩錄二卷朱道行詩經集思通
十二卷何楷毛詩世本古義二十八卷張次仲待軒詩

記六卷張睿卿詩疏一卷唐達毛詩古音考辨一卷張
溥詩經注疏大全合纂三十四卷高承埏五十家詩義
裁中十二卷朱朝瑛讀詩畧記二卷張星懋詩采八卷
高鼎燾詩經存旨八卷常調鼎詩經考定二十四卷趙
起元詩權八卷喬中和葩經旁意一卷胡紹曾詩經胡
傳十二卷范王孫詩志二十六卷

右詩類八十七部九百八卷

方孝儒周禮考次目錄一卷何喬新周禮集注七卷周

禮明解十二卷陳鳳梧周禮合訓六卷魏校周禮沿革
傳六卷官職會通二卷楊慎周官音詁一卷舒芬周禮
定本十三卷季本讀禮疑圖一卷陳深周禮訓雋十卷
周禮訓注十八卷考工記句詁一卷唐樞周禮因論一
卷羅洪先周禮疑一卷王圻續定周禮全經集註十四
卷李如玉周禮會注十五卷柯尚遷周禮全經釋原十
四卷金瑤周禮述注六卷王應雷周禮傳十卷周禮圖
說二卷學周禮法一卷非周禮辨一卷馮時行周禮別

說一卷施天麟周禮通義二卷周即登周禮說十四卷
焦竑考工記解二卷陳與郊考工記輯注二卷郝敬周
禮完解十二卷郭良翰周禮古本訂注六卷孫攀古周
禮釋評二卷陳仁錫周禮句解六卷張采周禮合解十
八卷林兆珂考工記述注二卷徐昭慶考工記通二卷
王志長周禮注疏刪翼三十卷郎兆玉注釋古周禮六
卷沈羽明周禮彙編六卷

已上
周禮

汪克寬經禮補逸九卷

黃玉潤儀禮戴記附注三卷何喬新儀禮叙錄十七卷

陳鳳梧射禮集要一卷湛若水儀禮補逸經傳測一卷

徐駿五服集證一卷王廷相昏禮圖一卷鄉射禮圖注

一卷喪禮論一卷喪禮備纂二卷舒芬士相見禮儀一

卷聞人詮飲射圖解一卷朱縉射禮集解一卷胡纘宗

儀禮鄭注附逸禮二十五卷郝敬儀禮節解十七卷王

志長儀禮注疏刪翼十七卷

已上儀禮

連伯聰禮記集解十

六卷朱右深衣考一卷黃玉潤考定深衣古制一卷永

樂中教修禮記大全三十卷

胡廣等纂

鄭節禮傳八十卷岳

正深衣注疏一卷楊廉深衣纂要一卷夏時正深衣考
一卷王廷相夏小正集解一卷深衣圖論一卷夏言深
衣考一卷王崇慶禮記約蒙一卷楊慎檀弓叢訓二卷
一名夏小正解一卷張孚敬禮記章句八卷戴冠禮記
附註

集說辨疑一卷柯尚遷曲禮全經類釋十四卷李孝先
投壺譜一卷黃乾行禮記日錄四十九卷聞人德潤禮
記要旨補十六卷邱樞禮記摘訓十卷徐師曾禮記集
注三十卷戈九疇禮記要旨十六卷陳與郊檀弓輯註

二卷姚舜牧禮記疑問十二卷沈一中禮記述注十八

卷王荳禮記纂注四卷郝敬禮記通解二十二卷余心

純禮經搜義二十八卷劉宗周禮經考次正集十四卷

分四卷樊良樞禮測二卷陳有元禮記約述八卷朱

泰禎禮記意評四卷湯三才禮記新義三十卷王翼明

禮記補注三十卷黃道周月令明義四卷坊記集傳二

卷表記集傳二卷縉衣集解二卷陳際泰王制說一卷

張習孔檀弓問四卷盧翰月令通考十六卷楊鼎熙禮

記敬業八卷閻有章說禮三十一卷

已上禮記

夏時正三禮

儀畧舉要十卷湛若水二禮經傳測二十八卷

大畧以曲禮儀

禮為經禮記為傳

吳嶽禮考一卷劉績三禮圖二卷貢汝成三

禮纂注四十九卷李黼二禮集解十二卷

合周禮儀禮為一集諸家

之說以解之

李經綸三禮類編三十卷鄧元錫三禮編繹二

十六卷唐伯玉禮編二十八卷

已上通禮

右禮部一百七部一千一百二十一卷

湛若水古樂經傳全書二卷張敬雅樂發微八卷樂書

雜義七卷韓邦奇律呂新書直解一卷范洛志樂二十

卷周瑛律呂管鑰一卷劉績六樂圖二卷黃佐禮典四

十卷樂典三十六卷何塘樂律管見一卷

一名律呂管見

呂柟

詩樂圖譜十八卷季本樂律纂要一卷律呂別書一卷

李文利大樂律呂元聲六卷大樂律呂考証四卷張謬

大成樂舞圖譜二卷古雅心談一卷李文察樂記補說

二卷四聖圖解二卷律呂新書補注一卷典樂要論三

卷古樂筌蹄九卷青宮樂調三卷劉漁樂經元義八卷

九代樂章二十三卷鄧文憲律呂解注二卷黃積慶樂

律管見二卷

正李文利之非

唐順之樂論八卷蔡宗兗律同二

卷楊繼盛擬補樂經一卷潘巒文廟樂編二卷李璧晏

饗樂譜一卷葛見堯含少論畧一卷呂懷律呂古義二

卷韻樂補遺二卷律呂廣義三卷孫應鰲律呂分解發

明四卷王邦直律呂正聲六十卷朱載堉樂律全書四

十卷樂和聲大成樂律圖說一卷何棟如文廟雅樂考

二卷史記事大成禮樂集三卷瞿九思孔廟禮集考五

卷李之藻類宮禮樂疏十卷黃居中文廟禮樂志十卷
梅鼎祚古樂苑五十二卷衍錄四卷唐樂苑三十卷黃
汝良樂律志四卷王朝璽律呂新書私解一卷王思宗
黃鍾元統圖說一卷八音圖注一卷葉廣禮樂合編三
十卷王正中律書詳註一卷

右樂類五十四部四百八十七卷

春秋本末三十卷

洪武中懿文太子
命宮臣傅藻等編

趙汭春秋集傳十

五卷附錄二卷春秋屬辭十五卷左傳補注十卷梁寅

春秋考義十卷張以寧春秋尊王發微八卷春秋春王正月考一卷辨疑一卷汪克寬春秋胡傳附錄纂疏三

十卷徐尊生春秋論一卷蔡深春秋纂五卷李衡春秋

釋例集說三卷石光霽春秋書法鉤元四卷永樂中救

修春秋集傳大全三十七卷

胡廣等纂

金幼孜春秋直指三

十卷春秋要旨三卷張洪春秋說約十二卷饒秉鑑春

秋會傳十五卷提要一卷張復春秋中的一卷童品春

秋經傳辨疑一卷余本春秋傳疑一卷郭登春秋左傳

直解十二卷邵寶左觚一卷楊循吉春秋經解摘錄一

卷湛若水春秋正傳三十七卷金賢春秋紀愚十卷劉

節春秋列傳五卷劉績春秋左傳類解二十卷張邦奇

春秋說一卷席書元山春秋論一卷江曉春秋補傳十

五卷魏校春秋經世書二卷蔡芳春秋訓義十一卷呂

柟春秋說志五卷許誥春秋意見一卷胡世寧春秋志

疑十八卷鍾芳春秋集要二卷楊慎春秋地名考一卷

湯虺春秋易簡發明二十卷季本春秋私考三十卷王

崇慶春秋析義二卷王道春秋億四卷胡纘宗春秋本義十二卷姜綱春秋曲言十卷李濂夏周正辨疑會通四卷陸梁左傳附注五卷春秋左氏觴二卷胡傳辨疑二卷任桂春秋質疑四卷黃佐纘春秋明經十二卷石琚左傳章畧三卷唐順之春秋論一卷左氏始末十二卷趙恒春秋錄疑十七卷魏謙吉春秋大旨十卷詹萊春秋原經十七卷林命春秋訂疑十二卷姚咨春秋名臣傳十三卷袁顥春秋傳三十卷袁詳春秋或問八卷

索仁鍼胡篇一卷邵弁春秋尊王發微十卷屬辭比事八卷或問

一卷凡例輯畧一卷傳遜春秋左傳屬事二十卷春秋左傳注解

辨誤二卷嚴訥春秋國華十七卷高拱春秋正旨一卷

姜寶春秋事義全考二十卷春秋讀傳解畧十二卷疏胡

傳之義意以便學者王樵春秋輯傳十五卷凡例三卷馬森春秋

伸義辨類二十九卷許孚遠左氏詳節八卷顏鯨春秋

貫玉四卷李攀龍春秋孔義十二卷汪道昆春秋左傳

節文十五卷吳國倫春秋世譜十卷見春秋列國事實於史記他書者

分國為諸侯世家

徐學謨春秋億六卷朱睦㮮春秋諸傳辨疑

四卷王錫爵左傳釋義評苑二十卷鄧元錫春秋繹一

卷黃洪憲春秋左傳釋附二十七卷黃正憲春秋翼附

二十卷馮時可左氏討二卷左氏論二卷左氏釋二卷

穆文熙國槩六卷余懋學春秋蠡測四卷凌稚隆左傳

測義七十卷錢時俊春秋胡傳翼三十卷冷逢震周正

考一卷徐卽登春秋說十一卷鄒德溥春秋匡解八卷

姚舜牧春秋疑問十二卷郝敬春秋直解十二卷鄭良

弼春秋或問十四卷存疑一卷續義二卷張事心春秋
左氏人物譜一卷陸曾華編春秋所見所聞所傳聞三
卷施仁左粹類纂十二卷陳可言春秋左傳類事三十
六卷曹宗儒春秋序事本末三十卷逸傳三卷左氏辯
三卷曹學佺春秋闡義十二卷春秋義畧三卷錢世揚
春秋說十卷王衡春秋纂注四卷魏靖國三傳異同三
十卷卓爾康春秋辨義四十卷張國經春秋比事七卷
錢應奎左記十一卷張銓春秋補傳十二卷馮伯禮春

秋羅纂十二卷耿汝恣春秋愍渡十五卷顧懋樊春秋
義三十卷王震春秋左翼四十三卷徐允祿春秋愚謂
四卷馮夢龍春秋衡庫二十卷林嗣昌春秋易義十二
卷張溥春秋三書三十一卷余颺春秋存俟十二卷虞
宗瑤春秋提要二卷劉城春秋左傳地名錄二卷孫范
左傳紀事本末二十二卷來集之春秋志在十二卷四
傳權衡一卷賀仲軾春秋歸義三十二卷便考十卷
右春秋類一百三十一部一千五百二十五卷

宋濂孝經新說一卷孫蕢孝經集善一卷孫吾與孝經
注解一卷方孝孺孝經誠俗一卷晏璧孝經刊誤一卷
曹端孝經述解一卷劉實孝經集解一卷薛瑄定次孝
經今古文一卷楊守陳孝經私鈔八卷余本孝經集注
三卷王守仁孝經大義一卷陳深孝經解詁一卷歸有
光孝經叙錄一卷李材孝經疏義一卷楊起元孝經外
傳一卷孝經引證二卷虞淳熙孝經邇言九卷孝經集
靈一卷胡時化注解孝經一卷吳撫謙重定孝經列傳

七卷朱鴻孝經質疑一卷集解一卷王元祚孝經彙注
三卷陳仁錫孝經小學詳解八卷黃道周孝經集傳二
卷何楷孝經集傳二卷張有譽孝經衍義六卷江旭奇
孝經疏義一卷瞿罕孝經貫注二十卷孝經存餘三卷
孝經考異一卷孝經對問三卷呂維祺孝經本義二卷
孝經大全二十八卷或問三卷

右孝經類三十五部一百二十八卷

將悌生五經蠡測六卷董彝經疑十卷黃潤玉經書補

注四卷經譜一卷周洪謨經書辨疑錄三卷王恕石渠
意見二卷拾遺一卷補缺一卷章懋諸經講義二卷邵
寶簡端錄十二卷王崇慶五經心義五卷王守仁五經
臆說四十六卷呂柟經說十卷楊慎經說八卷詹萊七
經思問三卷鄭世威經書答問十卷薛治五經發揮七
十卷丁奉經傳臆言二十八卷唐順之五經總論一卷
胡賓六經圖全集六卷陳深十三經解詁六十卷穆相
五經集序二卷王覺五經四書明音八卷蔡汝楠說經

劄記八卷朱睦㮮授經圖二十卷五經稽疑六卷經序

錄五卷陳士元五經異文十一卷王世懋經子臆解一

卷徐常吉遺經四解四卷六經類雅五卷周應賓九經

考異十二卷逸語一卷郝敬九部經解一百六十五卷

陳禹謨經言枝指十卷蔡毅中六經注疏四十三卷卜

大有經學要義五卷杜質明儒經翼七卷陳仁錫六經

圖考三十六卷楊聯芳羣經類纂三十四卷楊維休五

經宗義二十卷張瑄五經研朱集二十二卷顧夢麟十

一經通考二十卷

右諸經類四十三部七百三十四卷

陶宗儀四書備遺二卷劉醇四書解疑四卷周是修論

語類編二卷永樂中敕修四書大全三十六卷

胡廣等纂孔

諤中庸補注一卷黃潤玉學庸通旨一卷周洪謨四書

辨疑錄三卷丁璣大學疑義一卷蔡清四書蒙引十五

卷王守仁古本大學注一卷朱綬四書補注三卷夏良

勝中庸衍義十七卷湛若水中庸測一卷程嗣光四書

講義十卷呂柟四書因問六卷魏校大學指歸一卷王
道大學億一卷穆孔暉大學千慮一卷季本四書私存
三十七卷薛甲四書正義十二卷梁格集四書古義補
十卷金賁亨學庸義二卷蘇濂四書通考補遺六卷朱
潤四書通解十卷馬森學庸口義三卷廖紀四書管窺
四卷陳士元論語類考二十卷孟子雜記四卷許孚遠
論語學庸述四卷謝東山中庸集說啓蒙一卷唐樞四
書問錄二卷楊時喬四書古今文註發九卷李材論語

大意十二卷顧憲成大學通考一卷大學質言一卷管

志道論語訂釋十卷中庸測義一卷孟子訂釋七卷鄒

元標學庸商求二卷鄭維嶽四書知新日錄三十七卷

王肯堂論語義府二十卷史記事四書疑問五卷郝敬

四書攝提十卷姚舜牧四書疑問十二卷李槃中庸臆

說一卷吳應賓中庸釋論十二卷顧起元中庸外傳三

卷林茂槐四書正體五卷陳禹謨談經苑四十卷漢詁

纂二十卷引經釋五卷人物彙十五卷名物考二十卷

陶廷奎四書正學衍說八卷劉元卿四書宗解八卷陳
仁錫四書語錄一百卷四書析義十卷四書備考八十
卷張溥四書纂注大全三十七卷
右四書類五十九部七百十二卷

危素爾雅畧義十九卷朱睦㮮訓林十二卷朱謀㙔駢
雅七卷李文成博雅志十三卷張萱彙雅前編二十卷
後編二十卷羅曰賈雅餘八卷穆希文蟬史集十一卷
黃裳小學訓解十卷朱升小四書五卷

集宋元儒方進
辰名物蒙求程

若庸性理字訓陳櫟歷代蒙求
各一卷黃繼善史學提要二卷

何士信小學集成十卷

圖說一卷趙古則學範六卷童蒙習句一卷方孝孺幼

儀雜箴一卷張洪小學翼贊詩六卷鄭真學範六卷朱

逢吉童子習一卷吳訥小學集解十卷劉實小學集注

六卷邱陵嬰教聲律二十卷廖紀童訓一卷陳選小學

句讀六卷王雲鳳小學章句四卷湛若水古今小學六

卷鍾芳小學廣義一卷黃佐小學古訓一卷王崇文蒙

訓一卷王宗獻小學撮要六卷朱載堉困蒙錄一卷耿

定向小學衍義二卷吳國倫訓初小鑑四卷周憲王有

燉家訓一卷朱勣美諭家通談二卷鄭綺家範二卷王

士覺家訓一卷程達道家教輯錄一卷周是修家訓十

二卷楊榮訓子編一卷曹端家規輯畧一卷楊廉家規

一卷何瑋家訓一卷程敏政貽範錄三十卷周思兼家

訓一卷孫植家訓一卷吳性宗約一卷家訓一卷楊繼

盛家訓一卷王祖嫡家庭庸言二卷

已上小學

女誠一卷

洪武

中命儒

高皇后內訓一卷文皇后勸善書二十卷章聖

臣編

太后女訓一卷

獻宗為序世宗為後序

慈聖太后女鑑一卷內則

詩一卷

嘉靖中命方獻夫等撰

黃佐姆訓一卷王敬臣婦訓一卷

王直女教續編一卷

已上女學

洪武正韻十六卷孫吾與韻

會訂正四卷謝林字要源委五卷趙古則聲音文字通

一百卷六書本義十二卷穆正文字譜系十二卷蘭廷

秀韻畧易通二卷章黻韻學集成十二卷直音篇七卷

涂觀六書音義十八卷黃諫從古正文六卷顧充字類

辨疑二卷張穎古今韻釋五卷梁倫稽古叶聲二卷周

瑛書纂五卷音釋一卷王應電同文備考九卷楊慎轉

注古音畧五卷古音叢目五卷古音獵要五卷古音附

錄五卷古音餘五卷古音畧例一卷六書練証五卷六

書索隱五卷古文韻語二卷韻林原訓五卷奇字韻五

卷韻藻四卷方豪韻補五卷龔時憲玉篇鑑確四十卷

劉隅古篆分韻五卷潘恩詩韻輯畧五卷張之象四聲

韻補五卷陳士元古俗字畧七卷韻苑考遺四卷田藝

蘄大明同文集五十卷茅濤韻補本義十六卷焦竑俗

書刊誤十二卷方日升古今韻會小補三十卷程元初
五經詞賦叶韻統宗二十四卷黃鍾音韻通括二卷郝
敬讀書通二十卷林茂槐讀書字考畧四卷趙宦光說
文長箋七十二卷六書長箋十三卷梅膺祚字彙十二
卷吳汝紀古今韻括五卷吳繼仕音聲紀元六卷許字
遠音韻日月燈六十卷周宇字考啓蒙十六卷認字測
三卷周伯殷字義切畧二卷楊昌文篆韻正義五卷熊
晦類聚音韻三十卷楊廉綴笈舉例一卷數學圖訣發


明一卷顧應祥測圓算術四卷弧矢算術二卷釋測圓
海鏡十卷唐順之勾股等六論一卷朱載堉嘉量算經
三卷李瓚同文算指通編二卷前編二卷楊輝九章一



上
數

學類一百二十三部一千六十四卷

明史卷九十六



總校官編修臣吳紹濬